



Inatsisartunut Ilaasortaq
Hans Enoksen, Naleraq

05-08-2025
Sags nr. 2025 - 15506
Akt. id. 25583866

Postboks 970
3900 Nuuk
Tlf. (+299) 34 50 00
Fax (+299) 34 63 64
E-mail: isn@nanoq.gl
www.naalakkersuisut.gl

§ 37 naapertorlugu apeqquteqaammut nr. 113_2025-mut akissut.

Asasara Hans Enoksen

Inatsisartut suleriaasianni § 37 imm. 1 naapertorlugu, utoqqalinersiat pillugit Naalakkersuisunut apeqquteqarputit. Apeqqutinnut qujanaq, apeqqutigisallu ataani allaqqavoq:

1. Utoqqalinersiaqarneq pillugu Inatsisartut inatsisaat naapertorlugu, utoqqalinersiaqarnerup toqqammaviusumik aningaasartai isertitat allameersunit sunnerneqaratik tamakkiisumilli utoqqalinersiuteqartunut tunniunneqartalerpata qanoq aningaasaqarnikkut, allaffissornikkut, inuiaqatigiinnullu kinguneqassava periarfissaqartitsilissavalu?

Akissut:

Utoqqalinersianut malittarisassat atuuttut malillugit, toqqammaviusumik aningaasartat aamma utoqqalinersianut tapit isertitat tunngavigalugit appariartuaartinneqartarput. Toqqammaviusumik aningaasartanut aamma utoqqalinersianut tapinut appariartuaartitsinissamut immikkoortillugit killiliussaqqarpoq, tamatumalu saniatigut utoqqalinersialik kisermaajunersoq aappaqarnersorluunniit apeqqutaatillugu appariartuaartitsinissamut assigiinngitsunik killiliussaqqarluni.

Naalakkersuisut suliaq pillugu nassuiaateqarniarlutik tulluuttunik ilisimatitsissuteqarsinnaapput:

- 2023-mi kisitsisit tunngavigalugit utoqqalinersiallit kisermaat, utoqqalinersiallit aappallit aamma utoqqalinersiallit § 5, imm. 2 malillugu kisermaajusut akimorlugit inunnit katillugit 4087-init 358-it utoqqalinersianut tapinik appariartuaartitsinissamut killiliussat qaangerlugit aningaasarsiaqartut. Taassuma assingaa utoqqalinersiallit tamarmik 9 %-iisa missaat.
- 2023-mi kisitsisit tunngavigalugit utoqqalinersiallit kisermaat, utoqqalinersiallit aappallit aamma utoqqalinersiallit § 5, imm. 2 malillugu kisermaajusut akimorlugit inunnit 4087-init 73-it toqqammaviusumik aningaasartanik appariartuaartitsinissamut killiliussat qaangerlugit aningaasarsiaqartut. Taassuma assingaa utoqqalinersiallit tamarmik 2 %-iisa missaat.
- Appariartuaartitsinissamut periaatsit naligiilersitsisarput, appariartuaartitsinissamik atorunnaarsitsinerup naligiinnginneq annerulersissavaa aamma qaffasinnerpaamik



anigaasarsialinnut appasinnerpaamik anigaasarsialinnut sanilliullugit anigaasanik nammineq atorsinnaasaanik sulii amerlanerulersitsissalluni.

- Utoqqalinersianut anigaasartuutit ukiuni aggersuni annertuumik qaffattussaapput.
- Appariartuaartitsinissamut periaatsinik atorunnaarunnaarsitsineq piffissami 2025-2050-imi ukiumut minnerpaamik 79-118 mio. kr-inik akeqartussaavoq.

Erseqqissarneqassaaq, anigaasartuutaanerusut taaneqartut utoqqalinersianut anigaasartuutit qaffakkiartortussatut naatsorsuutigineqareersunut ilanngunneqartussaammata. Anigaasaqarnermut Akileraartarnermullu Naalakkersuisoqarfiup, inuiaqatigiinnik siumut naatsorsuineq nutaanerpaaq 2024-meersoq tunngavigalugu, Naatsorsueqqissaartarfik, Anigaasaqarnermut Siunnersuisoqatigiit aamma DREAM-gruppi suleqatigalugit Attassinissamik periutsimi takorluukkat assigiinngitsut sunniutaat pillugit naatsorsuineq nutartigaq maannakkorpiaq piareersarpaa. Inernerisa attassinissamik unammilligassap annertussusaanik assiliap katinnerani imaluunniit soraarnerussutisiaqartitsisarnermik aaqquissusseqqinnissamut periarfissat allaatigineqartut sunniuteqarnissaat tunngaviumik allannguuteqartitsissanngitsut naatsorsuutaavoq.

Nalunaarsuiffik 1-imi takuneqarsinnaapput, malittarisassat atuuttut allanngortinneqanngippata, ukiuni toqqarneqartuni ukiumut utoqqalinersianut anigaasartuutissat. Nalunaarsuiffik 1-imi appariartuaartitsinissamut malittarisassat peerneqarneranni anigaasartuutit aamma utoqqalinersianut anigaasartuutit naatsorsuutaasut katinneri takuneqarsinnaapput.

Tabel 1 Utoqqalinersianut anigaasartuutit anigaasartuutitut katinneqartunut katillugit

	2025	2030	2040	2050
Ukiumut anigaasartuutaanerusut (mio. kr.)	79	100	118	101
Utoqqalinersianut anigaasartuutissatut naatsorsuutigineqartut (mio. kr.)	524	694	813	696
Ukiumut utoqqalinersianut anigaasartuutit katillugit appariartuaartitsinissamut malittarisassat atorunnaarsinneqarneri ilanngullugit (mio. kr.)	603	794	931	797

Taamaalilluni piffissami 2025-p tungaanut ukiut tamaasa saniatigut anigaasaliinissat 79-118 mio kr-it ujarneqartussaapput, taakkua anigaasartuutissatut naatsorsuutiganut, tak nalunaarsuiffik 1, ilanngunneqassallutik.

Pingaarteqarpoq erseqqissassallugu, naatsorsuineri 2023-p naanerani kisitsisit aallaavigineqarmata. Naatsorsuineq arlalinnik ilannguttariaqartunik nangaassuteqarpoq.

Tamatuma saniatigut ilimagineqarpoq, 2023-mi pilersuisussaaqatigiinnerup atorunnaarsinneqarnera peqatigalugulu appariartuaartitsinissamut malittarisassanik atorunnaarsitsinerup kattunnerisigut annertuumik pissusilersornikkut allannguisoqassasoq. Periaatsinik marlunnik taakkunanga allannguneq amerlanerusunik sulerusunnermik kinguneqarsinnaavoq. Naak tamanna utoqqalinersiallit ikittuinnaat appariartuaartitsinissamut malittarisassat kingunerisaannik appariartuaartitsiffigitittaraluartut. Taamaalilluni pissusilersornikkut allannguneq qaffasinnerusumik anigaasartuuteqarnermik kinguneqarsinnaavoq, kisianni tamanna eqqoqqissaartumik naatsorsornissaa ajornarpoq. Tamatuma saniatigut oqaatigineqassaaq, ullumikkut inuit 300 miss. utoqqalinersiaqarsinnaatitaammata, kisianni utoqqalinersiaqarnissamik qinnuteqanngitsut. Appariartuaartitsinissamut periaatsit atorunnaarsinneqarpata eqimattaq taanna utoqqalinersiaqarnissamik qinnuteqarsinnaasoq ilimagineqarpoq.



Peqatigalugu aamma pingaaruteqarpoq aningaasarsianut killiliussat aningaasarsianut pioreersunut toqqaannartumik sanilliunneqarnissaat. 2023¹-mi 14-ileereersunut tamanut aningaasarsiat agguaqatigiissinnerat akileraarut sioqqullugu 291.577 kr-iupput. Utoqqalinersianik appariartuaartitsinissamik atorunnaarsitsineq pillugu nassuiaammi pingaarnertut inerniliinerni takuneqarsinnaasutut, utoqqalinersiallit ikittuinnaat appariartuaartitsinissamut killiliussat pioreersut qaangerlugit aningaasarsiaqarput. Soorunami malittarisassat allanngortinneqarpata eqqarsaatigisassaq unaavoq, amerlanerusut utoqqalinersiaqarnerup saniatigut immaqqa sulerusulissasut. Tamatumunngali qularnaveeqqusiisoqarsinnaanngilaq.

Appariartuaartitsinissamut malittarisassat peerneqarnerisigut, aamma periaatsit naligiilersitsisut peerneqassapput. Appariartuaartitsinissamut malittarisassat atorunnaarsinneqarnerisigut, aningaasarsiallini eqimattat siornatigut qaffasissumik isertitaqartut aamma malittarisassat atuuttut malillugit appariartuaartitsiffigineqartut, sulii amerlanerusunik utoqqalinersiaqalissapput. Qaffasinnerpaamik aningaasarsiallit peqatigalugu namminneq soraarnerussutisiassanik namminneq ileqqaagaqarnerat annertuneruvoq. Appasinnerpaamik aningaasarsiaqartut ikittuinnaat appariartuaartitsinissamut killiliussat qaangerlugit aningaasarsiaqarnerat pissutigalugu appasinnerpaamik aningaasarsiallit aningaasatigut nammeneq atoriaannarnik assigiinngisummik misigisaqarnavianngillat. Taamaattumik appariartuaartitsinissamut periaatsit atorunnaarsinneqarpata, utoqqaat akornanni aningaasaqarnikkut naligiinnginnermik annertunerusumik isumaqassasoq naatsorsuutigineqarsinnaavoq.

Naggataatigut eqqumaffigeqquneqarpoq, Naalakkersuisut juni 2025-mi Attassiinnarnissamut Ineriartornissamullu pilersaarut 2-mut suliaqarnissamut pilersaarut akuerisaanni tulluuttooq takuneqarsinnaammat: *"2025-mi immikkut ilisimasalinnik eqimattamik pilersitsisoqassaaq ukiup ataatsip ingerlanerani soraarnerussutisiaqartitsinissamik aaqqissuusseqqinnermut kaammattuuteqassaaq"*. Kaammattuinerit taakkua suliaasaqarfik pillugu 2026-mi naalakkersuinikkut isumaqatigiissuteqarnissamut tunngaviussasoq naatsorsuutaavoq.

Inussiarnersumik inuulluaqqusillunga


Bentiaaq Ottosen

¹ Kommunikkaartumik aningaasarsiallu suuneri malillugit inunnut 14-ileereertunut aningaasarsiat (2002-2023) [INDPI101], Naatsorsueqqissaartarfik